

KBC THUSO

OCTOBER/ELLHA 2022

Regd. No. 19134/88
<https://www.kbc.org.in> NAI/220/99
No-G4/Regd. Magazine/
KBCThuso/MNP-81

KUM
61
Ihinna
So514



Christian NEICHIN

November Events

Sunday School Day - 06
Chapangte Nikho - 13

*"Kapa theng eini pumkhat ihi bang a amaho jong pumkhat
ahitheina ding un, Nangman amahohi hong in"*

John 17:11

KBC Gambih 10
Joint Youthday 2022
at CC Singngat.



Education Board Chairman Dr. Ngamkhai Mate
leh Secretary Dr. Letthang Haokip in Mr. Akimupi
na



Govajang B/C houbung miten LRC Hosten
a um ho a ding in anme tampi ana peuvin ahi.



CONTENTS

THUMAKAI HO

MANIPUR GOVT. IN JUJUH HONGTA/ <i>Editorial</i>	1
TULAI HINKHO LAMHIL/ <i>Rev. Onkho Haokip</i>	3
CHRISTIAN YOUTH IN THE CHANGING WORLD/ <i>Pr. Seikhogin Haokip</i>	5
MISSION FIELD VISIT	8
MEN DEPARTMENT REPORT	11
WOMEN DEPARTMENT REPORT	13
YOUTH DEPARTMENT	16
CHRISTIAN EDUCATION DEPARTMENT	18
THEOLOGICAL EDUCATION	19
LITERATURE & PUBLICATION	21
OFFICE LEH GAMBHI THULHUT HO	23

EDITORIAL BOARD

Chairman	: Rev. Tonglet Haokip, President KBC
Editor	: Dr. M. Thongkhousei Haokip, General Secretary
Joint Editor	: Rev. Lunkhosei Tuboi
Contributing Editors:	1. Rev. Thongkholun Touthang 2. Rev. Lamkeng Lhouvum 3. Rev. Tongmang Haokip 4. Ms. Tingneihing Kipgen 5. Rev. T. Thangkhousei Haokip

Design & Layout - Hemkholen Haokip
Circular Manager - Ms. Vahboi Baite
Recorder Ms. Vahnunem Haokip

THUSO LAHMAN

Church/Organisation/Department : Rs. 300/-
Individual : Rs. 200/- (Post a Rs. 250/-)
Indian Overseas Bank, Imphal Branch
A/C No. 073201000000350 IFSC No. IOBA0000732
The General Secretary,
Kuki Baptist Convention,
Opp. D.M. College, Imphal 795001, Manipur
email: kbcindia@rediffmail.com

Advertisement bolnom hon Mobile No 8414919588
Circulation to kisai lam Mobile No. 8119030725 bolding



MANIPUR GOVERNMENT IN JUJOH HONGTA

EDITORIAL

(Prov. 20:1; Gal.5:21; 1 Tim.5:23)

Amasatah in muntina um Kuki Christian jouse ahidoh a KBC member ho jouse chungah i Pakaiyu Jesu Christa minin salaam kahin pecheh uve. Achesa hapta sung Manipur thusoh tuni geiya kisei jing khat chu ahileh 1991 a kipatna Manipur gamsungah Jujoh ana kikhah chu State government in ju kikhana ladoh ta tia houbung holeh nupi (Meira Paibi), chuleh kiloikhomna chomchomhon adou thu akimun ahi. Christian houbung khat hinan jong KBC in jong akidei pon, aum bangbanga tichu akikha jing ding akidei chu ahiye. Ahin, ipi jeh a hiche akum hijatpia kikhah ahondoh uva seiset japina akiholu ahidem? Ahilou leh hichea kona aphachom ima umthei ham ti hi thudoh theiset khat chu ahiye.

Mizoram a Congress government anaum chun amahon jong ju kijohtheina anahong uvin ahileh houbung lah a alenpen Presbyterian Synod hon nasatah in ademun ahin akhah deh pouve. Amaho (govt.) seidan chun, hiche kibol hin mihem hinkho tampi ahuhdoh u ahi atiue. Ajeh chu lampama aning akoiya jusem hon ju ahatna dingah ginchat



lou loutoh ahal uva ahileh adonho chu nasatah a kham jiuva nom asah u ahin, ahinla thina thei ding thil tampi pang ahijeh chun ahingsot pouvin ahi. Chuleh, amaho chu Centre a party dang BJP alet jeh uva sum muna ding dang umbeh lou jalla revenue lutna thei dinga abolu ahi akitie. Ahileh, Manipur context a hi Centre le state hi aninia party khat (BJP) chehcheh ahivuvin, ipi jeh ahidem? Sum muna ding hoitah khat a abolu ahidem ahilouleh Mizoram a Congress ho lunggel banga mihem huhdohna dinga lunggel khat aneiyu khattou ham? Thuso kimu dungjui chun Manipur chun jong hiche Kidney leh liver damlou atambah jeh a abol ahi tin ahilchen uve. Hiche damlouna kisei hohi ju phalou manbei lampi dunga kijohho donjalla soh a kingoh ahi. Alang khat a seiding chun Jujoh kikhah hen lang kihong jong leh eiho Christa nungjuiho itoh khah nadiu aumdeh poi tia seithei ahi. Kikhah jong leh adon ho chun adon thou thou diu, kihong jong leh adon thou thou diu ahi. Akihon vanga adon lou ding chun don lou thou thou ahi tia jong lah thei ahi. Hichehin nampi hinkho sukha lheh chu ahinan, hijong leh ama ama chang deilhena jong akiha ngap joe. Aphapen vang chu Bible in aseil banga bol lou/donlou hel apha ahi. Ju donkhama kiphinna ding leh ilimpet a iseil ngamlou lou sei ding igot pa chu adihlou ahitai. Ju chu mi dai chavaiya pang ahi ti kicheh tah in akiseiye. Jukham-julop jeh a insung tamtah gentheiya, nupa kikhen, midang toh jong, chate gentheina kisosah, sum le pai khonunga dinga gelna umthei lou, etc. hohi koiman amahmo louhela ahivanga kitim joulou jeh a kibol khat chu ahi. Tahsa kitim thei hin khopi khat lah sangin apha-joi akitie. Hijeh chun, itahsa hi Pathen intheng ahi hetdoh a adamna thei leh ahoina thei dinga kisinsah hi eiho mopohna ahiye. Lunglut tah a sim jouse chungu Pathen vangboh chang jing taken.





TULAI HINKHO LAMHIL

Rev. Onkho Haokip

Pastor, Centre Church, Neihsial veng

SERMON/ARTICLE


- Mihem hi Pathen sem cheh ahin, koimacha hi amantamjo le chungnungjo aumpoi.
- Hinkho hi midang deidan bouva ipui leh eima dei hinkho kimag doh lou ding ahi.
- Khat le khat chung chang kisei setto sangin kikihou toh leh boina tamtah bei jonte.
- Mihem in ahinkho akhel theyin, thilthah azil theyin, lampi thah ajot theye.

- Mi gentheina le vangsetna jouse Pathen gotna chang tia ngaitoa ei chung'a achuh teng Pathen ihou dih jeh'a kikimaitopia kiseihi lhagao hoithona ahi.
- Mi vangphatna le lolhinnaho jouse amangthah ding leiset loupina tia ngaitoa eima vangphatna jouse Pathen vangohna dihtah chang'a kigel hi lhagao phatlhemna ahi.

- Atah khat chu alhem sangkhat sangin amantam joi.
- Lunggel dihlouvin hinkho dih asemдох jou poi.
- Jou thua kivop sangin thutah'a kikhen aphajoi.
- Golpha lou akidalhah masang sen golpha tah akineidoh thei poi.
- Mihat jong alhu theyin milhasam jong adingдох kit theye.
- Mihem hinkho thil neocha'n asuhset thei chu thil neochann asuhat kit theye.

- Deichat khat jeh'a kingailut sang in kingailut jeh'a deichat kipehto aphajoi.
- Hinkho lhem'a lolhinna sangtah neisangin sukhelna akon kismthah aphajoi.
- Houin hi michonphaho loupina ding ahipon, michonsehon Pathen ahinbelnau mun ahi.

- Ni le lha avah phat akiban lou bangin mihem jong ama phat cheh'a vahdoh ji ahi.
- Miching alohin leh japi akipah in kimkhat avang hon lhomcha ki hoithosahna ahi.
- Vannoi na khel lamdang masangin nangma hinkho na kikhel masat angaiye.
- Idamtheina in ei chonset sah sangin idammona in Pathen heng eilhut ding aphajoi.
- Lamkai dihtah in kipumkhatna asemdoh in lamkai lhem in ki-bungkhenna asemdoh'e.





CHRISTIAN YOUTH IN THE CHANGING WORLD: MUSING ON TECHNOLOGY AND ITS EFFECT

By: Pastor Seikhogin Haokip
(Lecturer Shalom Theological Seminary)

SERMON/ARTICLE

Thumakai

vannoi kismetil a pat mihem te hinkhoa phatsim ma umjing khat chu ipi ham iti le kikhelna hi ahi. Kikhel nahi jatni a um in aphalam ma kikhel na le ase lam ma kikhel na hi ahi. Mihem khat hinkhoa hin aphalam ma kikhelna aum tengle hichu khantouna ahin ase lam ma kikhelna a um tengleh hichu manthah na ahi. Vannoiya kikhelna tampi umjungle nasa tah a mihem te hinkho hinkel lamdang penchu technology (mihem chihgil-na dungduiya manchah kisemdoha thale jung seng louva thilbol theina) hi ahi. Hiche technology lamma khantouna hi nasa tah in ahung machal in ahi le tukhang hin mijouse atongkha tan, mitampi din patchomna hijongle khangdong tampi din, hinkho setna, asohdoh tan ahi. Hijeh a chu tunia hiche paper in adoi le atup pipen chu Christian khangthah khat in vannoi khantouna (technology) iti iman chah diu ham ti iki hil diu ahi.

TECHNOLOGY HUNGKHAN TOUDAN THUSIM CHOMCHA

- 1) *Stone age technology (-----3000 BC) : Technology lam ma mihem te mit hana hung kipatna masa pen chu mihem ten song manchah a ahin kistem thei uva ahin manchah u hi ahi.*
- 2) *Bronze Age (3000-2500 BC):*
- 3) *Iron age (2500-1100 BC):*
- 4) *Invention of telephone : Antonio Meucci 1849 (Italy), Alexander Graham Bell in 1876 (USA)*
- 5) *Invention of television : German inventor 1880, color TV 1954 (US)*
- 6) *Invention of computer: Charles Babbage between 1833 to 1871*
- 7) *Invention of Cellular mobile phone: Martin cooper 1970 (USA) Motorola*
- 8) *Invention of internet: Tim Berners Lee world wide web (www.), 1990.*
- 9) *Invention of smart phone : Frank Conova 1992.*

TECHNOLOGY HI CHRISTIAN TE DIA APHATCHOMNA HO

Technology hungkhan touhi mitampi din phachom jongle CHRISTIAN TE a din apha chom dehset e kati nom in ahi ajeh ho chu ahi leh

1) Pakai Jesu Christa thupeh len (The great commission) Nangho vannoi gamtin ah cheuvin lang kipana thupha galhangsam un ati pen khu, Vannoiya technology thahat a kisem doh huikong (aeroplane) tuikong (ship), Train, chule Bus le adang dang ho hin nasa tah in Gospel kipana thupha machal din eiki thopi lhez jeng un ahi.

2) Printing press hung kisem doh jong hi Christain te adia aphot chomdan chu ipi ham iti leh masanga Bible hi tua banga lekha bua um lou ahin savun ho le thingna ho pouva ana jih uva ana koi u ahin, hinla Printing press ahung kisem doh a pat in Gutenberg kiti pan amasa pen adin Bible lekhabu in ana print doh in ahi. Masanga chu Bible hi munjouse kimu lou, koima jousen jong neijou lou ahi. Hinlah technology jeh in tunin mijousen Bible ikhut uvah iki choi thei taovin ahi.

3) 1934 kum chun Theodore Epp kiti pan Radio Program "

Back to the Bible" kiti khat ana bol in Christian holah a Radio mangcha a Pathen thu hillhang masapen ana hi e. Aban ban in Pathen thu hi Radio mangchan vannoi gamtin ah ahung kisei phongin ahi.

4) 1957 kum chun Billy Graham in a crusade bolna ah mi atamval behseh jeh chun, TV a live telecast ana bol masa pen e tin aki seiyin ahi. Hijeh chun mitampi in TV a kon in Billy

Graham thusei chu ana ngaijiu vin crusade a hung pangjou lou mitampi in jong penthah na ana neuvin ahi. Hichea pat chun TV hi Pastor ho le evangelist hon Pathen thuseina platform in ahin mang uvin nasa tah in Pathen thu hi vannoi ah ahung machal cheh cheh in ahi.

5) Internet hung umdoh a pat in Bible jong online a kimu ta, Online church jong hung umdoh ta, article topic idei dei google ibol le kimu thei ta, agom lam a seidin Bible thu jihthoa hihen aki seitho hijongle abonna internet a muthei ahi tan ahi. Hiche hin Pathen thu hetbe nalam pangah hatah in Christian te eiki thopi uvin

ahi. Tuhin USA lelei ah mega-church hi 800 val aum tan ahi.

6) Computer, smart phone ho ihin nei kit tao vin hiche hoa kon in youtube, facebook, whatsapp, instagram, chule application adang dang tam-pi hoa konin Pathen thu ingai thei taovin, share ibol thei taovin, fellowship ibol thei taovin ahi.

Hijeh chun technology hi Christian te adia aphant chom dan hi, i) Kipana thupha awgin hi muntampia athethang thei tan Pastor khat thusei hi mihem million khat val in angai thei tan ahi. ii) kum sottah luta ding khat chu technology jeh in phat chomkhat kah in aki jou thei e-Phat nasa tah in a save in ahi iii) Gospel kipana thupha phonjal nading lampi tampi ahung umdoh sah e iv) Christian atam jon tua hi smartphone ikhut iki choi u ahi tan ibon uva evangelist na tohna thei chance eipeh u ahi tai.

TECHNOLOGY IN CHRISTIAN HINKHO ASUH BOI NA HO

- 1) *Thiljouse abailam tahjeh in agilna le athuhna asulhom in Pathen thu min aja bolna hi alhomsuh cheh*

cheh tan ahi.

- 2) *Bible sim lhom cheh cheh ta*
- 3) *Taona mang lhomcheh cheh ta*
- 4) *Pathen thusanga leiset lam thua kimang tamjo ahi jeh in Christian khangdong tampi setna lam ah apui lut e i) Pornography ii) gaming iii) fashion iv) celebrity worshiper*
- 5) *Insunga nule pa ule nao toh relationship asu boi e*
- 6) *Insung maicham, Houin kai alhom sah chom e*
- 7) *Tahsa damtheina asukha e*
- 8) *Pu chon pa chon khankho nunkho asu lamdang tai*
- 9) *Pathen thu ngai, taona man, ho asu-boi e*

CHRISTIAN KHANGDONG KHAT IN TECHNOLOGY TOH ITI HINKHO AMAN DI HAM

- 1) Pathen hi thiljouse sanga chungnung joa koiding
- 2) Machine hi mihem in control ding eima machin ki control sah lou ding
- 3) Pathen Houna a smartphone, television, le computer ho manlou ding Pathen thu hetgilna bena a bou man ding
- 4) Bible thuhil toh kitoh isah lou ho vetlou ding bollouding
- 5) Gadgets ho hi needbase a manding timepass le entertainment a man lou ding

MISSION FIELD VISIT

*Rev. Lamkeng Lhouvum,
Mission Secretary*

Mission Column

1.Rev Helien Singsit le aloinu Thailand Gam'a dia vaikonta

Rev Helien Singsit leh a inneipi hi Serving in Mission (SIM) te noiya toh KBC in partnership a itohkhome ahi. Hiche toh kilhonin KBC Mission Board mopohna noiya 27th August 2022 nikho chun KBC office a kiman chah khompi na leh Thailand Gam'a Missionary khat din commissioning service akinei peh tan ahi. Hiche toh kilhonin ama ni jong 24th September 2022 nikho chun aumnao Shillong, India gam dalhan Thailand gam jonin ache taovin ahi. Gamthah pao chom chom kijil na mun'a che ahi jeh un, Pakai ya ding'a gam lentah ahin lah jou na diuin Houbung miten tao na in gel doh jingo hite. Rev Helien Singsit te nupa hin achate jong India gam'a lekha sim lai ho adalhah lhona Pakai gam keh len dia vai kon lhon ahitai.

2.Karbi-Anglong Amranjan Mission Centre mun'a Houin kisa panta.

KBC Centre Church Molnoi Area in kum 2 Project ding'a agonu, Karbi_Anglong Amranjan Mission Centre Houin sah chu akipantana ahi. Missionary Thangkholun Kipgen leh atohkhompi ho amachal jing thei na diuin Taona in gel doh jingo hite. Hiche Mission Centre mun'a hi Mission natoh na noiija Kids Grace Academy School jong kihong ahin Cross Culture Ministry noiija ina toh nao ahin, amachal jing thei nadin Taona in gel doh jingo hite.

3. Tripura Mission Centre Houin thah kisa pan ta:

Pastor Seikholen Guite, Missionary Lenkhohao Haokip chuleh Missionary Satyabashi mopohna noiija Tripura Mission field a Pathen lungset in Houin thah khat sah pan ahitan ahi. Hiche



Houin kisa hi Field thah kihonbe toh kilhona hiche mun'a hi Houin athah kisa ahin, jo a aum thei na dingin taona in gel doh jingo hite. Hiche a sum le pai angaicha ho jong aphant cha mu a aum thei na din tao peh jom jingo hite.

4. Nupa Camp lolhing tah'a kichaita.

Achesa nisim 1-4th September 2022 sung'a KBC Centre Church Molkon Bazar mun'a Nupa camp chu Pathen lungset in lolhing tahin akichaitan ahi. Houbung neo hijong leh asung'a Houbung mi ho kilung toh tah'a apan jallun kiman chah nah o anom lheh jengin ahi. Hiche Camp sung'a Gl. Gingoumang Kilong Camp Director in apangin chuleh Ng. Hoineng Touthang Vahchoi lasa in apangin anom lheh jengin ahi. Pathen in Centre Church Molkon Bazar phat thei boh jing tao hen.

5. Home Visit kinei ho:

KBC Mission Board in KBC Mission tohgon machal thei na dingin Home Visit leh Taokhomna mangkhomin sopi mi vilna akineijin ahi. Pu Christopher Dounge & Family KBC Mission Sponsored bol khat hina in visit akibollin ahi. Chubanin Dr. Ngamkhohao Haokip & family, Pu Seizalal Khongsai & Family, Pu Luneo Lhungdim & Family, Pu Sheikhongam Haokip & family, Pu Seithang Dounge & Family, Pu James Doujapao Haokip & Family, Pu Semlun Haokip & Family ho vilna leh taona akinei khomin ahi. Chuleh Pu S. Haokip & family amah o jong Mission Sponsors hina hin vilna akineijin ahi. Pathen in insung mi ho phat thei boh jing tao hen.

6. Main Sanctuary Building Construction machal jing:

Elijah Prayer Mountain a Main Sanctuary Building kisa Patghen lungset in ama chal jingin tu hin Achung akikhu doh tan ahi. Tu tu hin wall Plaster leh achung Ceiling atoh laitah u ahin amachal lheh jengin ahi. Hijeh chun Hiche a hi Pathen lungset na lolhina inei thei na diuin Houbung miten taona in gel doh jing hite.

7. Taona ngaichat:

Tuni chana KBC Mission natos na ding'a hin Mission share Cheng khat (One Rupees) jong pedoh thei lou lai Houbung 100 tobang aum nalaijin ahi. Missionary hi 75 ho ineiju ahin, chuleh Mission Centre chom chom a jong tohgon tampi akineijin toh doh ahi na thei din tao peh jingo hite. 1. Sikkim Mission field Church plot choh ding, 2. Bis Mile Arunachal Pradesh a Missionary Quarter kisachai lou lai, Tripura Huin kisa machal jing, Amranjan Mission field Houin kisa, Nepal Mission field Houin gam kilah be, Sugunu Mission Centre Hostel ding kichen kisah na ding ho Taona in gel doh jingo hite.



MEN DEPARTMENT REPORT

*Rev. Tongmang Haokip
Men Department Secretary*

Men Column

Pakai lenggamma katohkhompi Houbung mite jousele Pate jouse nabonun chulehiche thuso simjoue jong pakai min in Salam kahin peouve. Convention Men Department jong tuni chan geija natoh amachal jinga report petheija kaumjeh in Pathen kathangvahe.

Kumsunga Pate tohgon Gambih Wise Pate Revival Camp bolding anakiti chu pathen lungsetna jalin Gambih NO.1 Centre Church Game Village (NGV) muna achesa Dt 8 ---11th September 2022 sungin anive channa anakibolin Speakers (1) Rev Sholun Haokip (2) Rev. Tongmang Haokip Secretary Men Department (3) Camp Director Rev.Mangkholen Kipgen (4) Artiste Ng Lhingneichong Haokip ahi.

Dt 9th September nin Rev.Tonglet Haokip President KBC in eihungvilun tilkhouna nasatah eihung neiun achuga kipathu sangtah in kahin phonge. Dt 11th September Pu Seikholen Lupho Advocate in Class khat eihung lahpehun Camperhon aphatchompi lnehjenguve amachunga kipa thu kahin phonge.

Gambih sunga Pate thanom tahin ahung pangun mipilhinsel cheh Pate Camper in mi 122 (jakhatle somnileni) ahungpangun Camp lolhingtah in anakichaije . Hiche Camp machun kum 70 (somsagi) chunglang pate ahung pangho chungta jong atumbek in kipathu akiseije amahochu:- (1). Pu Seipao Doungel kum 82 (2) Pu Lhunjang Haokip kum 74 (3) Pu Mangjakhup kum 70 (4) Pu Thangmang Haokip kum 70 chule Camper lah akum lhompem Pa Jangminlal kum 25 chule Rev. Tonglal Haokip C/C Cannan veng imphal ahoubunga pate ahinkilhon pin apatna pat akikichai geijin phatah in pate aumpin achunga kipa thu ahung kiphongge kipana jalin Envelop neochacha anakipevin ahi.

Hiche Pate Camp lolhina dinga pathen minna panhinlaho:- 1. L.Song-

phal Baptist Church Gambih NO.1 in Chang tin 50 (somnga) ahintohun Butuitah akinen amaho jalin pathen kathangvahe. 2. Maohing Baptist Church Gambih NO.5 Houbung miten Meding Ahlu alhingselin ahintohun Maohing Ahlu tuitah akinen ahi. (3) Pu Lalboi chief of L. Gamnomjang & Family in dangka 5000/(sangnga) (4) Pa. Lenboi Haokip & Family C/C B.Vengnom in jong dangka 5000/(sangnga) Camp lolhin nadinga pan hinlaho jouse chungcheh a Convention Men Depatment thalhengin kipathu sangtah in kahin phonge pathen in amailamuva phatthei bohjing taohen.

Pate Camp kichaini ajing Dt 12/9/2022 Monday nijingkah matah in Gambih NO.18 Gambih Centre Khoding a December le 42 nd Men Department Annual Assembly cum Election le Gambih Khompi umding Programee sutoh semtoh dingin anakivai kondoh kitin pathen lungsetna jalin Gambih Executive change amun Houbung Deacon Board chule Gambih Pastor Letjakai singson lamkainan Programee semtohnya agakineijin ahi.

Lom Resource Centre:-

(1) Lom Resource Centre munjong pathen lungsetna jalin natoh achel-hajing in amachal jingun ahi. Achesa Dt 10th Saturday nin Gambih NO. 5 Pate mi 32 (somthumleni) natongin ahungkonun nalentah atongdohun achuguva kipathu seijoulou ahung kiphonge. (2) Dt 20th September (Tuesday) nin Solam Baptist Church Keithelmanbi Gambih NO. 5 Pate natongin mi 10 (som)ahung kongun nalen tah akitong doh kitin achuguva seijoulou vin kipathu ahung kiphonge. Gambih NO. 5 sunga Pateho jouse chungga kipathu ahung kiphonge chule koi Gambih hihenlang koi Houbung Pate hijongle Lom Resource Centre munna pathen minna natonga ahungkon thei chan jouse chungga kipathu ahung kiphonge.

(2) Lom Resource Centre day :-- Achesa Dt 18th September 2022 (Sunday) Lom Resource Centre day nin muntina Guest Speaker kisol hih jongle Men Work Cmmitteeho Gambih NO.6 langa akichen Houbung mitetoh kipahtah in akimangkhome, (1).Songjang Houbung a Rev. Tongmang Haokip Men Secretary (2) Pr Letminlal Khongsai Gambih Pastor Mother Church Tujangvaichong (3) Pu Kaikhohim Haolai V/ President Kotlen Houbung (4) Pu Thongkholal Haokip MWC recorder Holjang Houbung chule (5) Sun kaikhom Leisang Houbunga Gambih Pastor jaonan kabonun kakikhom kitun ahi. Muntina Houbung miten Lom Resource Centre day phataha emanjeh un Houg mite jouse chungga kipathu ahung kiphonge pathen in Hounung mite jouse phatthei boh jing taohen.



WOMEN DEPARTMENT REPORT

*Ms. Tingneihing
Secretary, Women Department*

Women Column

THE 1ST MEITHAI CONFERENCE REPORT

KBC Women Department mopohna noija Meithai khoppi akhat vei chan na ana kigong chu September 9-12, 2022 sung in Khopijang, KBC No. 21 mun a lolhing tah in ana kiche lhan ahi. Meithai delegate mong mong Gambih 23 lah a gambih 22 a kon in mi 660 alhing in Meithai hin kilhon pi lamkai ho leh adang dang ho pum in mi 693 vel akikikhom doh jou vin ahi. Kuki Baptist Convention in Meithai te gelkhoh na hi kum 30 masanga pat in ana kinei pan tan ahi. Meithai te Nikho tin kumseh leh Houbung jousen imang un chugoh hilou vin Meithai Camp jong 20 vei lam ana kibol doh tan ahi. Meithai camp masapen chu Chassad gambih a ana kibol in ahi. Meithai camp 20 vei ahung kibol chai jouva Khoppi masapen ahung kibol doh thei hi kipa umtah ahije.

Khoppi thupi in "Neithahsem kit tao vin Pakai" (Ps 80:3) akimang in ahi. Speaker in Rev Dr Thienkim Singson, Pi Lamkhoneng Haokip, Pi Lhingboi Haokip chuleh Pi Ngaineng Haokip apang un Pathen thu ngeitah tah eisei peh un Meithai delegate ho jong akipah thei lheh un Pathen thangvah aum e. Nu Kimpi Lotjem, Nu Titing, Nu Veineihing, Nu Otkhochin chuleh Nu Nemchin amaho chenga kon in delegate ho dia kitilkhouna thei Testimony loupi tah tah ngailhahna akinei jin ahi. Vahchoila, Skit leh Bible Lungchin mi tam pi a kon in akingai lhan adeh in Nu Ngailhing Guite C/C New Lam-bulane Chowkidar nu in kaikhom seh in Bible lungchin sao tah tah asim jing in delegate ho din kitilkhoh aum lheh in ahi.

Tuchung Khoppi lolhin thei na ding in mi tampin pan alan hiche ho lah a phabep gah min phah thei chu: Pu Jamkholen leh Nu Kim-neihoi Khopijang Inpitenei, Dr Jamlal Haokip, Proprieter Geenland Hospital, Pu Khupmang leh Pi Chongboi Lonpikhonou Inpitenei, Pu Lunkhosei Haokip leh Pi Vahneihing Molnom Inpitenei, Pu Tongkholun Haokip Molcham Inpipu, Pu Doulal Lonpikhonou, Pu Kamkholun Guite, Pi Neilam Haokip, Pi Lhingnu Kipgen, Pi Lhingbem

Haokip, Pi Dimneilhing, Pi Boicy Haokip, Pu DP Haokip, Pu Letjamang Hon'ble MLA 57 Henglep A/C. Pi Chinneivah ADC Moreh, Pi Vungneo Women Secy. Gb. No. 14, Pi Meme Lailoiphai Inpinu, Gambih No 11 GEC, Gambih No. 21 Women Department leh Mission Board, Gambih No. 12 Women Department, Pi Chinkim Langol, Pu Seiminthang Lumpheng, Evan Paoneo Khopijang, C/C New lambulane, C/C Kangpokpi. Amaho cheng hin Pathen leh Meithai ho ngailutna jal nei le nga leh sum le paija nasatah a pan ahin lah nao chung a kipa thu sangtah akiphong in ahi. Program sunga lam chom chom a pan laho jouse chung a jong kipa na sei joulou akiphonge.

Tu chung Meithai khoppi lolhin na ei peuva Hatchung nung Pathen loupina leh thangvah na ipeu vin ahi. Meithai tampin kipana leh kitilkhouna thah anei jun, delegate phabep in hitin asej jun ahi: "thithei inneipu kana nei jin tun vang athi thei lou innei pu kanei tah jeh in kkipana asange" ti ho akijah thei jeh in khoppi hi alohng e ti photchetna ahi.

Tuchung Khoppi a Meithai kum tampen chu Pi Lamchin, Zalenbung Gb. No. 2 Kum 85, chuleh akum lhom pen Nu Nengngaithem kum 22 Molcham Baptist Church Gambih No 22 a kon ahi. Tuchung Khoppi a lam dan na khat chu delegate ho jouse gamsa anme akinehsah thei chu ahi. Hiche hi Khopijang Inpipu hapan na jal ahin atum beh kipana sangtah iphong un ahi.

Conference Committee a kon in delegate jouse ngailut thilpeh del silkhat cheh akipe thei jin ahung kalsong ho jouse akipah un lung na chim jong aum in ahi. Nu Boinu Mangte South Korea a PhD. Jil lai in jong thilpha lentah eihin bol peh un kipathu sang tah akiphong in ahi.

CHAPANGTE NIKHO NOV. 13, 2022

Thupi: Chapangho Lungthenna hi Pathen kipana ahi (Matt.19:14)

Pakaija ngailut um tokhompi Houbung leh Gambih tinna lamkai ho amasan kangailut nao salam kahin peuve. KBC Calendar of Events dung jui jin November 13, 2022 Pakai nikho hi Chapangte Nikho ahung hitan ahi. Hiti ahijeh chun Houbung jousen hiche a dinga kigotna phate cha ina nei kit uva nom tah leh kipah tah a hiche nikho a hi lhagao leh tahsa lam a chapang hon phatthei achan na



diu va inaman cheh diu vin temna kahin nei jin ahi. Hiche nia thusei ding hi Houbung in apha pen ding ikigon diuvin tem ahi. Tukum a pat in Children Department in Children Worship Service (CWS) ahung kibol pan tan, hiche to lhon a tukum chapang te Nikho a jong hi chapang ho nasatah a pan ilah sah diu dei aum in ahi. Chuleh Houbung tin leh Gambih a lamkai ho jousen chapang ho ikhohsah cheh u to lhon in iti kibol leh chapang ho dia apha chom pen kibol doh thei di ham ti gel jing pum a chate dinga pan ilah jing diu vin temna sang pen kahin nei kitne. Chapang ho lah a I Pathen na toh nao khan tou bechek na dinga ngaichat sum le pai ho jong aning lhin thei na ding in hiche nikho le hin neitokhom ho jong angai ja bol mai mai pa hilouva hongphal tah leh kipah tah a lung na chim setna ihin todoh diu vin ngehna k ahin nei je. Pathen in dam na leh phat pha eina peh u leh chapang ho ding a thilpha bolbe ding maban na tampi inei juvin ahi. Hijeh chun chate semna ding in lamkai ho leh Houbung pum pin thanom tah in pan lakhom jing uhite. Kakipah e!

Taona a geldoh ding ho:

1. Ms Pretty Lhingneilam, Director Children Department, KBC leh a in sung mite ding
2. Evan. Chingboi, Child Evangelist leh ain sung mite ding
3. Children Worship Service (CWS) a lolhin thei na ding
4. CWS Syllabus phatah a akichai na ding
5. CWS Training of Trainers 2023 kumbul lama kibol ding alo lhin na ding

Happy Children's Day!

Pakai lhacha
Tingneilhing Kipgen
Women Secretary
Kuki Baptist Convention (I)

August 18 to 22, 2022 sung in Evan Chingboi , Miss Lhingboi leh Gl Satgin in Gambih no. 17 tour aga kibol in ahi. Centre Church Chassad, Lakhan, Molvailup, Kultuh leh Aishi houbung ho vilna akinei jin Houbung mi ho toh nom tah leh kipah tah in kiman khomna jong akinei jin ahi. Meithai Nikho in jong Kultuh, Molvailup chuleh Aishi Houbung 3 ho a kiman khomna akinei jin ahi.



YOUTH DEPARTMENT

*Rev. Lunkhosei Tuboi,
Secretary, Youth*

Youth Column

Rehabilitation Center kisah na Report.

KBC Youth Department tohgon nanoija in agon u KBC Rehabilitation Center kisah chu tule tuhin natoh machal tah in akitong pan tan ahi.

Ipi ding'a hiche Rehab center hi KBC in abol khoh ngai aham ti lunggel neile thusei jong ana umda pon ahi, hijeh chun akibollo napen jong neu khat kahin tahlng nom in ahi.

KBC hi Houbung mipi a kingai'a Pathen na itoh khom nao le Pathen min na ikiloi khom nao munpi chu ahi, masang khang chun ipu ipa teu vin, kilung toh tah a pankhom a eima sakhao cheh so a Pathen na toh ding ti akinop to nao chu tuhin milui phabep khat in eidalhah keu u hilou vin, atamjo jong kumtam lang ngen chu ahitan, tu phat hi khangthah te mopoh na phat chu ahung hitan ahi.

Pathen lungset chun KBC hi Pathen in phathei ahin boh in, khangthah mi tampi jong Government akon natoh hihen lang adang dang ho ajong lolhin na ihin nei tao vin ahi, hiche to kilhon chun, sum le pai jong ihung hao jo tao vin tudin mun hin pilhin na khat chu ihin nei tao vin ahi.

Hiche phat lait ah hin, Lhagao lamvai na phat ahung lhung tan, khantou najong aniseh in ahung machal jing in ahi, hito bang phat laitah hin Houbung sung'a kinep pi um tah tah khangdong, khonung a manchah thei tah dia kinep pi um tah mi ijat ham khat hi tulai khantou na kham nathei le kingol sah na a chun ahung lha lut tao vin ahile, khonung hinkho ding hi kinep na ahung lhasam kha tan ahi.

Ajeh chu tua khang dong ijat ham khat hi, Houbung Member bou hia, ahivanga la Houbung mite lah a kimu kha talou kimang cha thei talou, Houin kaikha talou, hiche keu hilouva Pathen jong hepaha talou tampi ahung um tan ahi. Akivet na ahile hitia khang-



dong hon Pathen hou na anahsah mo uva ahile, tu apat kum som(10) jou lang le koichu houbung mi hung hia koichun Pathen na ahin toh a chule koichun iki loikhom nao KBC hi ahin khohsah ding hitam ti hi akigel molheh tan ahi.

Hiche ho akigel jiteng le tua hi aphot cha a hitabang kham nathei jin apuimang khangthah ijat ham khat beh hi akinung chu lou va ahile, khonung teng le ihung lhahsam nao hung kipat na hidin aum tan ahi. Hiti jeh a chu hiche Rehabilitation Center for Drugs Users ho adia hung kistem kha ahi ti kahin sei nom me.

Alang khat na tutua KBC hi Mission natoh nalam a jong machal tah le gampam/Gamdang a jong kalsong'a Mission natong chu ihitaove, alangkhat na seiding chun hetlou mi le paodang tho ho bou chu Lhagao mangthai hitao vem tia jong kidoh nathei ding mun kilem tah in ahung um doh tan ahi. Gamdang le Paodang tho ho iboi pi pi laitah uva hi eiho Houbung sung le Gamsung a Lhagao mangthai ding aniseh a kibe jing ahitai ti jong igel doh diu vin kahin seinom in ahi, chute chu ahile tua i-Houbung sung ule l-gam sung uva Khamna thei jin apui mang isopiu ho hi kon aboipi ding hitam? Church in pan alah lou le kojijin pan alah ding hitam? ahilou le mi gamdang ho Missionary a ikikou kit diu hitam ti ho hi seilouva haimo khat in aum tan ahi.

Hiti jeh achu KBC Youth Department bolthei pen di tia Rehab hi hung kigong a tua hi insah na hatah a kikhoh sah a kimalchal pi laitah ahin, KBC Youth Department in mo po jong le khonung ding gelkhoh najalla Houbung miten jong pan ilah khom uva hiche Rehab hi agang thei pen na sah chai ahia, khangdong hihen, minu mipa hinkho hijong le themkhat beh ihuh doh jou thei nadiu va pan ilah khom diu hi poimo jo ham tia kahin tah lang ahie.



CHRISTIAN EDUCATION DEPARTMENT

*Rev. Dr. Letthang Haokip
Secretary, Education Board*

Christian Edu. Column

CBSE thu a Gauhati Kholjin na: Ningkum General Assembly 2022 Salem Sapormeina a CEB te recommendation "Dr Colvin Academy Moreh CBSE Recognition Apply Bolding" ti kiphat sahna aumtoh kilhon a Date 27th September nikho chun Pu Ngamkhokhai toh Pu Thongkholet Mate Director CBSE North East Region kimupi na kaganei lhon in ahi. Aman ase chu ahileh Assembly a inasei bang uva chu CBSE Recognition mudinghi Board dang sanga advantage gam cheng a hoiho ahi.

Ahinla, hicheche hi amuhah in a jeh chu amahon thildang chung chon a school infrastructure ima jong phatah a a vwet u ahi, Buildingho class rooms, laboratory, playground, office rooms chule toilet ho abon a pucca ahitei angaiye. Aman asei bena achun ama jong umsot behseh louding ahitoh kilhon a bol doh tei ding itiu leh basic infrastructure ho akin lam thei pen a su-tohdng chuteng leh apply bol pei ngal ding ahi. Chu jongleh CBSE Recognition hi private school bol atamjohin adelin kiha-chu ahijeh in Convention in bol mong mong ding natiule hungkino uvin tin eihin vailah lhon in ahi.

Hitih ahijeh chun muntin a houbung/Gambih chule Centre Churches lamkai hojouse kom a taona nom chu Education share 2022 a penai loule pe bangkhai jousen hitabang akinthei pen a tohdng aum tahjeh in boina dang dang umjong leh ihin gel khoh cheh uva ikisuh theng cheh dinguvn ikhetsah uve.



THEOLOGICAL EDUCATION

*Rev. Dr. Letthang Haokip
Secretary, Education Board*

Theological Edu. Column

Application for Theological Scholarship

KBC sunga houbung hoa kon a KBC in apom Theological College (ATA/ Senate of Serampore) noiya Theology simlai B.D/ M. Div. a pat chunglam Final Year simlai hon kumsim a KBC in jokham kham a kitthopina le tosotna a kipeji chu ahung lhung ding 2023 kum a dinga Scholarship Apply bol phat ahitai. Application form hi KBC office a Receipt & Issue Ms. Vahboi Baite kom a muthei ahi. Tahsa tah a Application Form gakilah manlou hon KBC WhatsApp group hoa kon a download akibol a, print akibol doh a, angaicha document ho toh Scaned Copy a Application/ Registration fee Rs. 100/- (Rupees one hundred only) pum a ahin peh lut tha ding, application/ registration fee hinpeh tha louho application form kisan peh louding, Scholarship a dia register kibol lou ding ahi.

Apply hinbol theiding ho

- KBC in apom Theological College ho (AT/ Senate of Serampore) noiya BD/ M. Div. a pat chunglam Final Year simlai, themvetna masa hoa kon a Second Class a pat chunglam ho bou.
- KBC sunga houbung mi kicheh tah hiding.
- A course chu ATA/ Senate of Seampore in achepi dih tah ho bou hiding.

Application Form peh lutna ding

Application Form hi KBC office a Receipt & Issue Ms. Vahboi Baite ahiloule Principal, Shalom Theological Seminary khat joh joh kom a peh lut thei hi. Angaicha document ho lhing louva hung kipelut application form ho screening a pang louding ahi (Angaicha document ho Application Form a akipe e)



Application Form peh lutna phat
Application Form hi 20th December, 2022 masang ngeiya peh
lut tei ding ahi. 20th December, 2022 jouva application form ki-
sang talou ding ahi.

Hetchet be nom neiho dia Contact No.
9089593092/ 7005525033 (Principal, STS)
7005017150 (Vice Principal, STS)

Rev. Dr. Haoneo Haokip
Principal, STS
(Secretary/ Convenor, Theological Education Board)





LITERATURE & PUBLICATION

*Rev. T. Thangkhosei Haokip
Secretary, Literature & Publication, KBC*

Theological Edu. Column

SUNDAY SCHOOL THEMVET NA

Hiche hi Pathen phatsah ahileh Nisim 4/12/2022 nileh KBC pum-pi a ding a Gambih Centre cheh a Gambih Pastor leh atohkhompi ho makaina a kibol ding ahi. Hiche masang a hi Houbung jousen akibol masat ding, Houbung khat a kon a mi 5 cheh kilheng doh a amaho chun Gambih Centre a Convention level a abol ding ahi. Hiche nikho a Themvet na a pang ding chu Pilhing, Senior I le II cheng hi ding ahi. Noilam cheng chu Houbung mopoh na hi ding ahi. Chule Thudoh ding dan hi Objec-tive/Multiple Choice a 50 marks hiding, adang chu 50 marks a kon a jat chom chom a hung kisem ding ahi. Thudoh kisem dan hi thupi hilou vin apang ding jousen Bible le Hilchetbu chu ahasim phot ule adonbut ding dan chu bailam jeng ding ahi. Chule Themvet na hi Prize sanna ding a akingaito leh setna aum nom in, chusang in 'ichan kahet hinam' tji oh gelna in pan laute.

Chule Sunday School Themvet na ding a Thudoh hung kithot ding ahijeh in Houbung ala le alalou het na ding in Gambih Pastor khut a Form hung kithot nahinsei peh diuvin temna kahin neije.

GITAN LOU BIBLE SIM

Hiche hi tu chan hin Houbung phabep in ahinpen kipa aum e. lham tia ahinpe sa kihai, ahilou leh ahin pelut nailou hon Gambih Pastor pa kom a hinvel hetsah(remind) un, kisempha ding ahi.

BIBLE PUMPI 7 VEI SIMCHAI

Hiche hi tuchan hin khat beh jong hin amin ahinpe lut naipon, asim chai jousen 7 vei mong hihih jong leh namin u hinpe uvo.

SUNDAY SCHOOL TEACHERS TRAINING

Hiche hi Kumdang a KBC Assembly masang a kibol ji ahin, 2023 kum a hi KBC Assembly jou January 1-4 sung a bol ding a Assembly a phalna kila ahitai. Amun ding hi gamla(C/C Chavangphai, KBC No. 15) ahijeh in Lekhabu hi amun a kimu lou maithei ahin ahung ding jousen kichoh masat ngai ahi. Chule Jilkung ho ding hi Houbung a Class umjat hetdoh masat a Assembly masang ahilou le Assembly teng le hopdoh masat ding jong lunggel ahijeh in tukum sunga Houbung apang ding ho hetdoh masat ding akideijin, Gambih Pastor hon aumjat ahedoh na ding hung kigong ding ahi. Achet achai vang Program a hung pang tante.

SUNDAY SCHOOL LEKHABU

Hiche Pilhing a kiboipi jing ahin, Dec.22 sung a mutei ding tohgon ahi. Adang Beginner I - Senior II chan vang neng chet a kikoi ahitai.

SUNDAY SCHOOL DAY

Hiche nikho hi Nisisim 06/11/2022(Sunday) hiding ahin, Houbung miten alhangpi kin-gon toh hung kithot lou maithei ahin, eimahon anop na thei tah a thanom na tah a ina man khom cheh ding un ngehna ahung kineije. Chule Message hi November Issue in alap lou ding jeh in October Issue a hi hung kijao sah ding ahitai. Chule hiche nikho a neito khom inei kham kham u chu Office a eihung thah dinguvn avel in hetsah na ahung kinei kit e.



OFFICE LEH GAMBIH THULHUT HO

Thulhut ho

KIPATHU SEINA

Tuchung GAMBIH No.12 NUTE CAMP 2022 tohgon'a kinei chu Pathen milungsetna leh puihoina jal in 26th - 30th Sept. 2022 sung in Molphei Baptist Church mun a Rev. Demneh DOUNGEL leh Miss ANEM HAOKIP teni speaker hina, Rev. JAMMINLUN KIPGEN, Gambih Pastor Camp Director hina leh Ng. LHINGNEICHONG HAOKIP artiste hina in lolhing tah in ana chelha tan ahi.



Tuchung Nute Camp lolhing tah a imanthei na'u hi Gambih leh Gambih Dept ho, Gambih sung a Houbung ho, Houbung Department ho leh changval a kipehna nei ho jal ahijeh in nachung cheh uva kipathu seijoulou kahin phong uvin, adeh in changval kipehna neiho jouse nathilpha bol nachung uva Pathen in phatthei naboh jing uhen.

Speaker a eipan peh u Rev. Demneh DOUNGEL, Miss ANEM HAOKIP, Camp Director a eipan u Rev. JAMMINLUN KIPGEN, Gambih Pastor chuleh lasa a eipan peh u Ng. LHINGNEICHONG HAOKIP ho jouse chung a jong kipathu seijoulou kahin phong uvin, Pathen in malam a jong namangcha jing uhen lang phatthei naboh jing uhen. Chuleh speaker teni leh artiste nu eihin thahpeh uleh ei gathah peh u Gambih Pastorpa chung a jong kakipa na'u kahinphong uvin, Pathen in phatthei bohjing hen.

Gambih Nute Camp umna ding mun eiphalpeh uva, lhunna gena ijakai eisuhkup peh u Molphei Houbung chung a seijoulou kipathu kahin phong uvin Pathen in na phungvuh jing uhen. Chuleh neh leh chah tuitah a eisem peh u Molphei Pate leh Nungah gollhang ho chung a jong kipathu seijoulou kahin phong uve, Pathen in phatthei naboh jing uhen.

Chuleh Nute Camper a hungjao jouse chung a jong kipathu sangtah kahin phong uvin, Pathen in minu lolhingtah nahinso tei uhen.

Pathen in ikiloikhom na'u phatthei boh jom jing taken

M/E BOARD, KBC No. 12



SAMARITAN MIPHA PA NATOH

Dated: The 22nd September 2022,

Tuni chun KBC No.23 hopsunga Chingphei Baptist Church hin houin thah kisa jinglai chu, achung khuna ding (Church Roofing CGI Sheet best quality) Gambih No.23 hopsunga houbung ho jouse kitho khomna jallin ana kithahlut thei tan ahi. Ima jouse gongtoh chung Pathen a hi jallin, loupina leh choi atna Ama ip-euve.

Gah hetding khat chu, Chingphei houbung hi Gambih No.23 sunga dia houbung lhasampen khatchu ahi. Jotlut jong ahahsan, kijah matpi jong ahahsatna kom aum in ahi. Hijehchun, Gambih Assembly a ahahsat dan thu ho akisei khomin, amahohi houin thah sajing lai ahiuvin, panpina, kithopi ngaicha jing ahiuve tin lunggel khomna ana kineijin, houin chungkhu hi Gambih minna ikhu diu ahi akitin kiphatsahna ana kineitoh kilhonna tuni nikho chun Pastor Pa makainan Gambih Lamkai chengse toh thahlut-na akineijin ahi.

Hiche tohgon hi Gambih sunga aum khalou thil ahin, chuleh Gambih makaina noiya donation kibolla tohgon lenpen hidingin

jong ginchat aum e.

Achainan. Houbuna ho pan halah naial ahiieh. Gambih Pastor



hina jal leh Chingphei houbung thalhengin kipathu sangtah akiphonge. Pathenin houbung ho phattheina bohjing jeng taken, Amen.

“Ahin phatna bol le thil peh phal’ a kihomdel’a thilbol chu sumil loujenun; ijeh-inem itile chutobang kithoina chungha chun Pathen alung lhai behseh jin ahi.” Hebrews 13:16

Keima

Rev.Tingoulen Haokip

Pastor, KBC No.23

NUPA CAMP LOLHING TAH A KICHA I TA

KBC Centre Church Molkon Bazar, Gambih no. 3 mun na “NUPA CAMP” kigong chu damsel chan chai ana hitan ahi.

Rev Lamkeng Lhouvum, Secretary Mission & Evangelism Speaker ana hin, Gl. Gingoumang Camp Director Ng. Hoineng Guest Artiste in anapang in ahi.

Rev Henjalen Doungel, Pastor Gambih no. 3 in Nisim 1 September, 2022 nilhah in Camp chu Pa- Pathen Chapa- Pathen chule Lhagaotheng-Pathen min in hondoh na ana nei ahin, Nisim 4 September, 2022 nilhah in khumkhan ana hitan ahi.

“ Na insung kistem tuptan” ti thupi mangchan Camper mi 50 vel in pan ana lan, lhaogam lam phatthei na tampi changpum in Camp khumkha ana hitai.



KIPA THUPHON NA

Baptist Church K.Gamnomphai KBC Gambih No. 23 in achesa Nisim 11 September 2022 nikho chun kum tohgon na ana kinei Houbung sunga Minu Mipa te ho jouse toh malam a lhagao leh tahsa hinkho chetoh thei nading le khantou machal na aumbe thei nading hatah a akigel jing toh kilhon in One Day Seminar Program chu lolhing tah in ana kimang chai tan ahi.



Hiche Seminar kibol na chun Rev. Prim Vaiphei Resource person in apang in ahi.

Houbung le gamsung chule insung hi Lhagao lam le tahsa lam a alhahsam nale ilhah suh nao hi insung minu mipa ahi ti thudol in jong houlim na anei jin ahi, kitil khou um tah thuhil nale thumop na akinei toh kilhon in Pu Rev. Prim Vaiphei chung'a jong seijou lou kipa thu kahin phong un ahi. Pathen in maban hinkho a eima pui cheh tao hen.

Chukit le Houbung Kumbul Assembly a kinop to na dung juijin Chate Camp jong bol ding pha ana kisan, hiche toh kilhon chun achesa Nisim 1-2. October 22. nikho ni in Camp Speaker in Pu Rev.Dr. Paul Paolen Haokip, apang in, chule Camp Director in



Evan. Thanga kipgen ana pan na in lolhing tah in bit keichan Pathen jallin ana kichai thei jin Pathen Kathangvah lheh uve.

Pathen in Camp Speaker pa le Cam Director pu jong nasatah in amang cha in, chate naote mi tampin Pathen hetbe nale Lhagao lam ma kihet chet na jong anei jin, Pathen manchah thei Pakai lhacha te ni jallin Pathen kathang vah lheh jeng uve. Pathen in maban na jong alenggam machal nading in mang cha jing lhon tachen. kakipah e.

Keima

Haothang

H.Deacon K.Gamnompai



Gambin Na. 12 Nute Camp lolhing tah in ana kichaitan ahl.



Centre Church Molkon a Nupa Camp lolhing tah in ana kichaitan ahl.

Post Regd. MNP/81
Regd. No. 18134/88



KBC Events Education Sunday Nikho a mun chom chom a houbung ho a Speaker ana kisol peh dungjul i Pathen lungset na jal in lothing tah in Houbung ho a Education lam a machal na thei ding in Pathen thu ta kitoh a Message eiga bai peh ho lim kimu phabep ahung kilakhom in hiche lai mun oh hin ahung kitoh dah in ghi.

If undelivered, please return to
The Editor, KBCTHuso
Kuki Baptist Convention
Opp. DM College, Imphal - 795001
Contact: 9892053173

